

der grossen vnd kleinen Decoction gemischt / oder angemischt /  
 brennlich oder unbrennlich / also sagen einmündig alle Philosophi /  
 dann es ist gewiß daß alle Ding / sey auß / oder von dem / in welches  
 es resoluiert wirdt / dann es durch mittel der werme in Wasser  
 verwandelt wirdt / so ist es offenbar / daß es anfänglich Wasser  
 gewesen ist. Also alle Metallen werden verwandelt in mercurium,  
 derwegē sie erstlichē auß mercurio, die weise aber in mercuriū zu  
 bringen / wirdt vnden angezeigt. Durch dieses wirdt auffgelöset /  
 was Aristot. quarto meteororum spricht / sollen derwegē wissen  
 die Weisen Meister der Alchemen / daß die Species der Metallen  
 nicht können geendert werden / vnd das ist wahr / es sey dann / daß  
 dasselbige wie folget / gebracht werde in ihr erste materiam, solche  
 widerbringung ist leichtsam / vnd möglich gegen einander / dann  
 alles was wachset vnd geboren wirdt / wirdt auch gemehrt / als da  
 erscheint in allen Kräutern / Bäumen vnd Thieren / daß auß ei-  
 nem Korn tausendt Körnlein wachsen / vnd auß einem Baum tau-  
 sendt Aeste herfür schießen / vnd von einem Menschen das ganze  
 menschliche Geschlecht geborē wirdt / also wirdt ein jegliches nach  
 seiner art gemehret. Also auch ein Metall kan auß ihr mehr ein  
 Metall / vnd ist kein vnderscheid. Also spricht Aristoteles / ob dises  
 in natürlichen oder künstlichen Instrumenten geschehen / zc. Alle  
 Metall aber werden geboren vnd wachsen in der Erden / so ist auch  
 wol möglich daß in jnen vilfaltige mehzung sey / auch ohn endtlich.  
 Daß aber in jhnen vilfaltigkeiten vnd mehzung sey / kan anderst nit  
 beschehen / dann durch dises / daß da vollkommen ist in den Metal-  
 len. Ihre vollkommene anzeigung ist der Metallen ganz Arzney /  
 welches ist das Elixir Philosophorum, zu disem Elixir zukommen  
 ist vnmöglich / dann allein durch sein medium. Besiße nuhn die  
 eigenschafft solches mittels / in welchem allzeit ist der begriff der  
 eussersten Ding / die eussersten Ding aber sind Sulphur vnd Mer-  
 curius, vnd das vollkommene Elixir auß disen so mehr gereiniget /  
 decoquiert vnd digeriret / dise seind besser / vollkommener vnd auch  
 neher. O lieber Freund irre dich nicht / daß was der Mensch säyet /  
 das wirdt er auch ernden vnd schneiden / jetzt ist gnugsam erleu-  
 tert / was für ein Stein / was seine Arzney / welchem nichts fremb-